

SAOPŠTENJE ZA JAVNOST U POVODU DJEČIJE NEDJELJE

Obilježavanje dječije nedjelje u Bosni i Hercegovini je tradicionalna manifestacija kojom želimo skrenuti pažnju na potrebe i položaj djece. Ove godine, želimo da skrenemo pažnju na nekoliko najbitnijih elemenata koji se najsnažnije odražavaju na dječije živote, i da podsjetimo sve koji rade sa djecom i za djecu, (a to smo svi!) da ih u svim svojim aktivnostima promišljaju i uzimaju u obzir da je to naša obaveza, kao zemlje koja je ratifikovala Konvenciju o pravima djeteta.

Djeca su oduvijek bila dio populacije koji je trebao posebnu pažnju društva usmjerenu na zadovoljavanje njihovih potreba, što je i razlog nastanka Konvencije o pravima djeteta. Danas svjedočimo da se u vrijeme velikih kriza svuda u svijetu, pa tako i kod nas, ova potreba da se djeca zaštite sa posebnom pažnjom umnogostručava. U svim poteškoćama sa kojima se suočavaju odrasli – djeca su još više pogođena.

Četiri osnovna principa na kojima počiva Konvencija o pravima djeteta, i koja smo obavezni da primjenjujemo i u svojim zakonima, i u njihovoj provedbi, u donošenju odluka na najvišim nivoima a i u svakodnevnom životu, put su ka postizanju bolje zaštite djece.

U tom smislu, prvi princip i dječije **pravo na život, opstanak i razvoj**, mora biti osnovna polazišna tačka za sve nas. Ovaj princip se često pojednastavljuje i svodi na prosto pravo na život, zanemarujući njegov drugi dio koji nas obavezuje da tom djetetu koje je rođeno, obezbijedimo uslove za opstanak i nesmetan razvoj, do dječijih punih potencijala.

U ovom nastojanju ne smije se izostaviti ni jedno dijete, što od nas zahtjeva poštovanje principa **nediskriminacije**, koji je protkan kroz sve članove Konvencije. Danas se posebno moramo podsjetiti na ovaj princip jer se odnosi na svu djecu koja se nađu na teritoriji zemlje koja je ratifikovala Konvenciju o pravima djeteta, bilo da su njeni državljani ili ne. Djeca koja se u bilo kojoj situaciji nađu u BiH, moraju imati obezbijeđenu zaštitu svojih prava, i mi smo obavezni da tu zaštitu organizujemo.

Djeca nisu objekti, kojima se smije manipulirati, iako se vrlo često nađu u toj situaciji. Svi zajedno se moramo učiti boljoj komunikaciji sa djecom, obezbjeđivanjem prilagođenih informacija djeci, slušanjem njihovih iskustava, želja, izraženih potreba. Naše akcije moraju uzimati u obzir dječija mišljenja i iskustva, ako želimo da ono što činimo za njih bude odgovor na njihove stvarne potrebe. **Pravo djece da učestvuju u donošenju svih odluka koje se njih tiču** jeste njihovo pravo, ali i razvojna potreba.

Danas vas podsjećamo da imamo obavezu prema djeci, koju smo potpisali, zajedno sa skoro svim zemljama svijeta, da sve što činimo bude u **najboljem interesu djece**. U složenoj zemlji u kojoj živimo, sa ostacima teške i bolne prošlosti, suočeni sa siromaštvom i neizvjesnom budućnošću, ovo bi moglo biti usmjerenje koje bi svima donijelo dobrobit.

Njegujući i štiteći djecu koja danas rastu, izgrađićemo u njima povjerenje u društvo, bez kojeg nema stabilne zajednice. A bez stabilne zajednice bazirane na povjerenju i zadovoljnim potrebama svih koji u njoj žive, teško je da ćemo dočekati bolju budućnost.

Vijeće za djecu Bosne i Hercegovine, 5. 10. 2015. godine